



JUDICIAL **SYSTEM** MONITORING PROGRAMME

PROGRAMA MONITORIZASAUN **SISTEMA** JUDISIAL

Komunikadu Imprensa
Tribunál Distritál Suai

10 Abril 2014

Rezidencia Juis Tribunál Distritál Suai hetan asaltu husi ema diskoñesidu

Iha 08 Abril 2014, rezidencia juís/autór judisiáriu Tribunál Distrital Suai hetan asaltu husi ema diskoñesidu balun ne'ebé diskonfia involve iha prosesu balun ne'ebé sei lao hela iha Tribunál Distritál Suai.

Antes kazu ne'e akontese, iha 04 Abril 2014, maisumenuz iha 15:00 lorokraik, ema nain rua ba hasoru juísa ne'ebé kaer nia kazu iha rezidencia juís sira nian iha Distritu Suai. Entre visitor nain rua ne'e, nain ida identifikadu nu'udar arguidu ba kazu balun ne'ebé sei prosesu hela. Iha momentu ne'eba, ema nain rua ne'e tenta atu oferese osan ba juís ho intensaun atu influencia desizaun ba kazu ne'e. Maibe juísa ne'e rezeita atu simu oferta husi arguidu no duni ema nain rua ne'e fila.

Depoizde akontesimentu ne'e iha loron hat tuir mai, maisumenuz iha tuku 03:00 madrugada, iha 8 Abril 2014, ema diskoñesidu balun, ba juís sira nia rezidencia no tebe juísa nia odamatan dalabarak. Juísa ne'e sente tauk no hakilar makas hodi husu ajuda, hafoin ema hirak ne'e halai lakon husi fatin akontesimentu ne'e.

Akontesimentu ne'e, rezulta juísa refere sente amisadu teb-tebes no la livre atu kaer nia funsaun ho livre no goja nia independensia hanesan juís, tanba tauk ba ameasa sira seluk tuir mai relasiona ho kazu ne'ebé nia kaer no kazu sira seluk iha futuro.

Mesmu la iha evidensia konkreta katak grupu diskoñesidu ne'ebé ba asalta rezidencia ne'e, maka ema nain rua ne'ebé mai hasoru juísa iha loron hat antes ne'e, maibe faktu sira ne'e bele lori ita ba konkluziun provizóriu katak grupu ne'ebé lansa atake no terror ne'e, mai husi ema sira ne'ebé iha ligasaun ho prosesu sira ne'e sei lao hela.

“Kazu ne'e grave no treste teb-tebes tanba elementu sira ne'e buka atu sobu fali esforsu sira ne'ebé ita investe atu hamos ita nia sistema judisiáriu husi prátika subornu ka kualker forma sira seluk. Tentativa sira hanesan ne'e laos afeita deit ba juís hanesan individu, maibe prátika sira hanesan ne'e prejudika no amiasa ba ita nia sistema justisa, amiasa ba ita nia demokrasia, tanba ema hirak ne'e, buka atu salva kazu ida no sakrifika ita nia sistema,” dehan Luis de Oliveira Sampaio, Diretór Ezekutivu JSMP.

Iha survei ne'ebé JSMP halo ho majistradu sira husi Tribunál Distritál Dili iha Jullu no Setembru tinan 2013 kapasidade instituisaun judisiáriu, seguransa no bem-estar ba autór judisiáriu sira, JSMP simu lamentasaun katak autór judisiáriu sira servisu iha risku ba teror no intimidasaun, tanba hetan ameasa husi arguidu tanba ezerse sira funsaun ba kazu ne'ebé sira kaer.

JSMP rekomenda makas ba Ministériu Justisa no Sekretáriu Estadu Seguransa atu kordena no dezenvolve sistema ne'ebé realistiku hodi hatan urjentemente ba situasaun seguransa ba juís no autór judisiáriu sira.

JSMP hanoin katak, antes estabelese mekanismu propoiu no adekuaudu tuir kontestu situasaun Timor nian, JSMP rekomenda ba Ministériu Justisa atu buka solusaun alternativu temporáriu hodi monta, sistema seguransa hanesan tau seguransa sivíl iha rezidensia autór judisiáriu sira no monta sistema alarme hodi fo sinál/xamada atensaun ba autór sira wainhira iha tentativa ameasa ba sira nia vida seguransa.

JSMP rekomenda makas ba elementu sosiedade tomak atu respeita ita nia instituisaun judisiáriu sira no autór sira ne'ebé dedika sira nia an atu hametin justisa iha Timor Leste. JSMP mós rekomenda atu investiga profundu ba ema na'in rua ne'ebé tenta prátika krime subornu hasoru juísa iha nia rezidensia.

Atu hetan informasaun kle'an liután favór kontaktu:

Luis de Oliveira Sampaio

Diretór Ezekutivu JSMP

Diresaun e-mail: luis@jsmp.minihub.org

info@jsmp.minihub.org

Telefone: 3323883 | 77295795

Website: www.jsmp.tl